

Նախագահում է *Գ. Տեր-խաչատրյանը*:

Օրակարգի հարցերն են.

1. Օրինագիծ արդյունաբերական հիմնական և լրացուցիչ տուրքերի ավելացման մասին.

2. Օրինագիծ Հայաստանի խորհրդի նախահաշվի մասին.

3. Պառլամենտական հանձնաժողովների լրացումների խնդիրը.

4. Կառավարությանն ուղղված հարցումներ.

5. Ընթացիկ գործեր:

Ակզբուն արտ[աքին] գործ[ոց] մինիստր Տիգրանյանը և ներքին գործոց մինիստր Արամը պատասխանում են էսդեկ և էսեռ ֆրակցիաների չորս հարցումներին ու Դաշնակցության մեկ հարցման.

1. *Հարց* - Համաձայն է, արդյոք. արտաքին գործոց մինիստրը Մինիստր-Նախագահի այն հայտարարության հետ, որ մեր արտաքին քաղաքականությունը մնալու է նույնը: Պատասխանում է, որ արտաքին քաղաքականությունը կապված է ընդհանուր քաղաքականության հետ ու որոշվում է կաբինետի կողմից: Հարցի պատասխանը ավելի մանրամասն կլինի կառավարության դեկլարացիայում, որը մոտ օրերս կկարդացվի: Առայժմ հայտարարում է, որ կառավարությունը կաշխատի ազատ պահել ժողովուրդն ու հայրենիքը արտաքին վտանգներից՝ խորհրդի ցուցումներով առաջնորդվելով, իհարկե:

2. *Հարց* - Թիֆլիսի թերթերում տպված է մի լուր, որ իբր Սուրմալուի և Դամարլուի շրջանները արդեն դատարկված են. ի՞նչ աղբյուրներից է այդ լուրը և ի՞նչ է անում կառավարությունը, որ այդ և նման սուտ լուրեր չտարածվեն:

Մինիստրը պատասխանում է, որ այդ լուրի աղբյուրը մեզ հայտնի չէ, այնպես որ սրան կան նրան վերագրելու իրավունք չունենք, բայց կառավարությունը կհերքի այդ լուրը:

3. *Հարց* - Ի՞նչ է արել կառավարությունը գաղթականների վերադարձի համար, համաձայն անցյալ միստի որոշման: Հայտնվում է, որ կրկին դիմել է թուրքաց ներկայացուցչին՝ խորհրդում ընդունված որոշման հիմունքներով:

4. *Հարց* - Ի՞նչ է արվել մեր դպրոցական գործը բարվոք պայմանների մեջ դնելու համար: Պատասխանվում է, որ դպրոցական շենքերը հետզհետե ազատվում են և դպրոցները՝ վերաբացվում:

Անփոփոխ ընդունվում է արդյունաբերական հիմնական և լրացուցիչ տուրքերի ավելացման մասին եղած օրինագիծը:

Խորհրդի նախահաշիվը վերադարձվում է կոմիսիային՝ վերամշակելու: Օրակարգի մյուս խնդիրները հետաձգվում են, և միստը փակվում է:

«Կառավարության լրաբեր», 12 նոյեմբերի 1918թ.